

Na osnovu odredbi člana 50. stava 4. Zakona o ugostiteljskoj djelatnosti («Službene novine Federacije BiH», broj 32/09), federalni ministar okoliša i turizam, donosi

PRAVILNIK
O RAZVRSTAVANJU, MINIMALNIM UVJETIMA I KATEGORIZACIJI
UGOSTITELJSKIH OBJEKATA U SELJAČKOM DOMAĆINSTVU

I. OPĆE ODREDBE

Član 1.

Ovim Pravilnikom propisuju se: vrste, minimalni uslovi za vrste, kategorije, uslovi za kategorije, oznake za kategorije, način označavanja kategorija, način kategorizacije objekata u kojima se pružaju usluge smještaja u seljačkom domaćinstvu.

Član 2.

Objekt u seljačkom domaćinstvu (u daljnjem tekstu: objekt) funkcionalna je cjelina na seljačkom gospodarstvu u kojem se gostima, ovisno o vrsti, pružaju ugostiteljske usluge pripremanja i usluživanja jela, pića i napitaka, uobičajenih za kraj u kojem se nalazi seljačko domaćinstvo, usluge smještaja, te ostale usluge u funkciji turističke potrošnje.

II. RAZVRSTAVANJE OBJEKATA U SELJAČKOM DOMAĆINSTVU

Član 3.

Vrsta objekta u seljačkom domaćinstvu određena je ovisno o: vrsti ugostiteljskih usluga u seljačkom domaćinstvu koje se u objektu moraju obvezno pružati, pretežitosti i obveznom minimumu ugostiteljskih usluga, načinu usluživanja te drugim uslovima propisanim ovim Pravilnikom.

Član 4.

Vrste objekata u seljačkom domaćinstvu su:

1. Vinotočje/Kušaonica,
2. Izletište,
3. Soba,
4. Apartman,
5. Kamp.

Član 5.

Da bi objekt iz člana 4. ovoga Pravilnika bio razvrstan u vrstu, mora, ovisno o vrsti, ispunjavati sljedeće uslove:

1. opće uslove za vrstu,
2. opće minimalne uslove,
3. minimalne uslove za vrste Soba, Apartman i Kamp,
4. minimalne uslove za vrste Vinotočje/Kušaonica i Izletište u skladu sa prilogom I. ovoga Pravilnika,
5. uslove za kategoriju za vrste Soba, Apartman i Kamp u skladu sa priložima II. – IV. ovoga Pravilnika.

III. OPĆI USLOVI ZA VRSTE – DEFINICIJE VRSTA

1. Vrsta – Vinotočje/Kušaonica

Član 6.

(1) Vrsta Vinotočje/Kušaonica je objekt u kojem se gostima pripremaju i uslužuju vina i/ili voćna vina i/ili proizvodi od vina i/ili voćnih vina i/ili ostala alkoholna pića i/ili naresci (suhomesnati proizvodi, sirevi i slično) koji se sljubljuju s tim pićima i/ili namazi, za najviše 50 gostiju istodobno.

(2) Umjesto naziva Vinotočje/Kušaonica mogu se koristiti nazivi: Vinotočje (uslužuju se pretežito vina i/ili naresci i/ili namazi) ili Kušaonica (uslužuju se pretežito naresci i/ili namazi i/ili pića).

2. Vrsta – Izletište

Član 7.

Vrsta Izletište je objekt u kojem se gostima pripremaju i uslužuju topla i hladna jela te pića i napici za najviše 50 gostiju istodobno.

3. Vrsta – Soba

Član 8.

- (1) Vrsta Soba je objekt u kojemu se gostima pružaju usluge smještaja.
- (2) U vrsti Soba moraju se pružati usluge prehrane, pića i napitaka (doručka ili polupansiona ili pansiona).

4. Vrsta – Apartman

Član 9.

- (1) Vrsta Apartman je objekt u kojem se gostima pružaju usluge smještaja, opremljen tako da gost može sam pripremati i konzumirati hranu.
- (2) U vrsti Apartman moraju se pružati usluge prehrane, pića i napitaka (doručka ili polupansiona ili pansiona).

5. Vrsta – Kamp

Član 10.

- (1) Vrsta Kamp je objekt u kojem se gostima pružaju usluge kampiranja (smještaja na uređenom prostoru na otvorenom – na kamp mjestu i/ili kamp parceli), uz korištenje pokretne opreme za kampiranje, vlastite ili iznajmljene od pružatelja usluga: vreća za spavanje, šatora, kamp prikolica (kamp kućica, karavana), autodomova (kampera), stolova, stolica i slično.
- (2) U vrsti Kamp moraju se pružati usluge prehrane, pića i napitaka (doručka ili polupansiona ili pansiona).

(3) Pokretna oprema za kampiranje mora održati pokretnost mehanizma i ne smije imati nikakvu stalnu povezanost za teren. Priključci pokretne opreme na infrastrukturu se moraju moći maknuti u svakom trenutku. Na smještajnim jedinicama zabranjeno je samoinicijativno postavljanje: trajnih učvršćivača, ograda, popločenje tla i slično.

(4) Na prostoru Kampa mogu se nalaziti i trgovački objekti u funkciji turističke potrošnje, koji su organizirani, ustrojeni i/ili posluju sukladno posebnim propisima.

IV. MINIMALNI USLOVI

1. *Opći minimalni uslovi*

Član 11.

(1) Sve vrste objekata moraju ispunjavati opće minimalne uslove.

(2) Iznimno od odredbi stava 1. ovog člana, objekt, uz prethodno pribavljene isprave na osnovu propisa o zaštiti historijsko-kulturnih dobara, može odgovarajuće odstupiti od minimalnih uslova, odnosno uslova za kategoriju propisanih ovim Pravilnikom. Ovo odobrenje ne može se dati za propisani modul te u slučaju ako nisu osigurani uslovi za nesmetanu i potpunu funkcionalnu namjenu objekta.

1.1. Isticanje naziva seljačkog domaćinstva te naziva vrste i kategorije

Član 12.

(1) U blizini objekta ili na glavnom ulazu u objekt mora biti vidno istaknuta oznaka izrađena od prirodnog materijala iz kraja u kojem se objekt nalazi (domaći prirodni materijal) s nazivom »seljačko domaćinstvo«, imenom domaćinstva (nije obvezno), propisanim nazivom utvrđene vrste te oznakom kategorije ako se objekt kategorizira (zvjezdica).

(2) Na ploči iz stava 1. ovog člana može se istaći: simbol u skladu sa ponudom i kraju u kojem se nalazi seljačko domaćinstvo, uz naziv Kušaonica i naziv proizvoda koji se pretežito uslužuje (Kušaonica rakije, Kušaonica pršuta, Kušaonica kobasica, Kušaonica sira i slično) te ostale informacije.

(3) Ako seljačko domaćinstvo u jednoj građevini ima više objekata iste ili različitih vrsta i kategorija, tada je dovoljno na jednoj ploči istaknuti naziv svake vrste i oznaku svake kategorije (zvjezdica).

(4) Seljačko domaćinstvo na ploči iz stava 1. ovog člana te na promotivnim pločama koje moraju biti od domaćega prirodnog materijala može umjesto naziva seljačko domaćinstvo istaknuti komercijalne nazive agroturizam, seljački turizam i slično.

1.2. Uređenje, oprema i sigurnost

Član 13.

(1) Objekt mora biti uređen i opremljen u skladu s tradicijom kraja u kojem se nalazi.

(2) Objekt mora biti uređen i opremljen tako da omogućuje: nesmetano i sigurno kretanje i boravak gostiju i članova domaćinstva, nesmetan prijenos stvari te odgovarajuće čuvanje robe, hrane i pića.

(3) Unutarnje uređenje objekta mora biti bez oštećenja i znakova dotrajalosti, oprema i uređaji u objektu ne smiju biti oštećeni i moraju biti u ispravnom i funkcionalnom stanju.

(4) Vanjski izgled objekta mora biti bez oštećenja i znakova dotrajalosti, a okoliš objekta mora biti uređen.

1.3. Priključak na infrastrukturu, instalacije i komunalni otpad

Član 14.

(1) Objekt mora stalno raspolagati dovoljnim količinama zdravstveno ispravne vode za piće koja se osigurava priključkom na javni vodovod, a gdje javni vodovod ne postoji, to se mora osigurati na drugi propisani način.

(2) Objekt mora biti priključen na javnu električnu mrežu ili na drugi odgovarajući način biti opskrbljen električnom energijom.

(3) Objekt mora imati osiguranu telefonsku vezu (fiksnu ili mobilnu).

(4) Električno osvjetljenje mora biti osigurano u svim prostorijama objekta.

(5) U svim prostorijama objekta u kojima borave gosti mora biti osiguran odgovarajući način grijanja prostorija s temperaturom najmanje 18,5°C, uz mogućnost prozračivanja.

(6) Komunalni i ostali otpad mora se redovito odstranjivati iz objekta.

(7) Odvodnja otpadnih voda iz objekta mora se osigurati priključkom objekta na javnu kanalizacijsku mrežu, a gdje te mogućnosti nema to se mora osigurati na drugi propisani način.

(8) Iznimno od odredbi stava 5. ovog člana, u objektu u kojem se usluge pružaju samo ljeti, ne mora biti osigurano grijanje prostorija. Smatra se da se u objektu usluge pružaju ljeti ako je to u razdoblju od 1. maja do 31. oktobra tokom godine.

1.4. Zaštita od požara i prašine

Član 15.

(1) Objekt mora imati spremnike i koševe za otpatke od vatrootpornog materijala.

(2) Oprema i pribor u vrijeme kada nisu u uporabi moraju biti zaštićeni od prašine.

1.5. Unutrašnje visine prostorija

Član 16.

(1) Unutrašnja visina prostorija i modula (visina od poda do stropa) mora biti najmanje 2,40 m.

(2) Iznimno od odredbi stava 1. ovog člana, u građevinama izgrađenim do dana stupanja na snagu ovog Pravilnika smatraju se prihvatljivim postojeće unutarnje visine prostorija i modula, uz uslov da postoji mogućnost prozračivanja (prirodno ili mehaničko) i da je osigurano nesmetano i sigurno kretanje gostiju i članova domaćinstva.

(3) Iznimno od odredbi stava 1. ovog člana, u svim prostorijama i modulima s koso izvedenim stropom ili stropom različitih visina, prosječna unutaršnja visina mora biti u skladu sa odredbama stava 1. ovoga člana.

1.6. Uslovi za lica s invaliditetom

Član 17.

Objekt mora imati osiguran, gdje je to moguće, pristup za lica s invaliditetom.

1.7. Sanitarni čvor za goste uz ugostiteljske sadržaje za usluživanje hrane, pića i napitaka

Član 18.

(1) Objekt mora imati sanitarni čvor za goste uz prostorije i/ili prostore za usluživanje hrane, pića i napitaka.

Sanitarni čvor čini:

1. zahod za žene koji se sastoji od: prostorije u kojoj je zahodska školjka (zahodska kabina) i predprostorije u kojoj je umivaonik,
 2. zahod za muškarce koji se sastoji od: prostorije u kojoj je zahodska školjka (zahodska kabina), predprostorije u kojoj je umivaonik i pisoar.
- (2) Zahodi u objektu se moraju nalaziti u blizini prostorija i prostora za usluživanje.
- (3) Zahodi moraju imati visoku zahodsku školjku (školjku sa sjedalom) na ispiranje tekućom vodom.
- (4) Pisoar u zahodu za muškarce mora biti zidna školjka s ispiranjem tekućom vodom te treba biti postavljen ili ograđen tako da se ne vidi izvan prostorije u kojoj se nalazi.
- (5) U sanitarnom čvoru mora biti besprijekoran red i čistoća, a prostorije moraju biti dezinficirane.
- (6) Iznimno, od odredbi stava 1. ovog člana objekti vrsta Kamp i Soba kategorije dvije zvjezdice, ne moraju imati sanitarni čvor za goste uz ugostiteljske sadržaje za usluživanje hrane, pića i napitaka već se gosti mogu služiti zajedničkim sanitarnim čvorom za goste uz smještajne jedinice.

1.8. Uslovi za pripremu i usluživanje hrane, pića i napitaka

Član 19.

(1) Seljačko domaćinstvo koje gostima priprema i pruža usluge prehrane, pića i napitaka (doručak, polupansion, pansion, ostala topla i hladna jela, nereske i namaze) mora u blizini objekata imati ugostiteljske sadržaje odgovarajućeg kapaciteta, opremljene i uređene na prikladan način, za pripremu i konzumiranje hrane u skladu sa ovim Pravilnikom.

(2) Ugostiteljski sadržaji iz stava 1. ovog člana jesu: prostorija za pripremu, restoran za usluživanje (prostorija) ili prostor za usluživanje na otvorenom (natkrivena ili nenatkrivena terasa i slično) za objekte u kojima se posluje ljeti.

(3) Seljačko domaćinstvo može na otvorenom prostoru ili u prostoriji odnosno zatvorenom prostoru pripremati hranu na tradicionalan način (ražanj, roštilj, peka, gradele, krušna peć, rašlje, kotao i sl.)

2. Minimalni uslovi za Sobu i Apartman

2.1. Površina smještajnog dijela objekta – modul

Član 20.

(1) Ukupna korisna površina objekta za smještaj (neto površina na upotrebi gostu) naziva se modul.

(2) Modul objekta propisan je ovisno o vrsti i kategoriji objekta.

2.2. Kapacitet smještajnog dijela objekta

Član 21.

(1) Kapacitet objekta određuje se prema broju kreveta.

(2) S obzirom na kapacitet, soba (prostor za spavanje) može biti:

1. jednokrevetna – ima jedan krevet za jedno lice,

2. dvokrevetna – ima dva kreveta za po jedno lice ili jedan krevet za dva lica.

(3) Iznimno od stava 2. ovog člana, u postojećim objektima, soba s obzirom na kapacitet može biti i trokrevetna ako je površina modula sobe veća za 3 m² od površine propisane za dvokrevetnu sobu.

(4) Iznimno od stava 2. ovog člana, u jednokrevetnoj i dvokrevetnoj sobi, ako je površina modula sobe veća za 3 m² od propisane za utvrđeni kapacitet sobe, na zahtjev gosta se može namjestiti dodatni krevet.

(5) S obzirom na kapacitet svaka prostorija za spavanje u apartmanu može biti:

1. jednokrevetna,

2. dvokrevetna.

(6) Iznimno od stava 5. ovog člana, na prostorije za spavanje u apartmanu odgovarajuće se mogu primijeniti odredbe stava 3. i 4. ovog člana.

(7) Iznimno od stava 5. ovog člana, u apartmanu u prostoriji za boravak mogu biti dva dodatna kreveta, ako dodatnih kreveta nema u prostoriji/ama za spavanje.

(8) Pod pojmom »dodatni krevet« iz odredbi ovog člana podrazumijeva se krevet koji nije stalno namješten u objektu, a namješta se na zahtjev gosta (trosjed, dvosjed, fotelja – grupa za sjedenje). Uz takav krevet ne moraju se nalaziti obavezni propisani elementi (noćni ormarić, noćna svjetiljka, tepih uz krevet). Takav krevet ne izražava se u kapacitetu objekta.

2.3. Zajednički sanitarni čvor za goste uz smještajne jedinice

Član 22.

(1) Objekt koji nema vlastitu kompletnu kupaonicu (soba kategorije dvije zvjezdice) mora imati zajednički sanitarni čvor za goste uz smještajne jedinice.

1. pod pojmom »vlastita kompletna kupaonica« podrazumijeva se kupaonica koja se nalazi u modulu objekta, a koriste je isključivo gosti tog objekta i ima: zahodsku školjku, umivaonik s ogledalom i policom za odlaganje stvari, kadu ili tuš kadu ili tuš te ostale propisane elemente,

2. pod pojmom »zajednička kompletna kupaonica« podrazumijeva se kupaonica koja se ne nalazi u modulu objekta (ulaz iz zajedničkog hodnika), a koriste je svi gosti i ima: zahodsku školjku, umivaonik s ogledalom i policom za odlaganje stvari, kadu ili tuš kadu ili tuš te ostale propisane elemente,

3. pod pojmom »zajednička djelomična kupaonica« podrazumijeva se kupaonica koja se ne nalazi u modulu objekta, a koriste je svi gosti i ima: samo umivaonik s ogledalom i policom za odlaganje stvari, samo zahodsku školjku, samo kadu ili tuš kadu ili tuš ili kombinaciju bilo koja dva naprijed navedena sanitarna elementa.

(2) Objekt može imati djelomičnu kupaonicu u modulu sobe.

(3) Dva objekta koji nemaju vlastitu kompletnu kupaonicu za goste (soba kategorije dvije zvjezdice) mogu umjesto zajedničkog sanitarnog čvora za goste uz smještajne jedinice imati jednu zajedničku kompletnu kupaonicu.

(4) Na zajednički sanitarni čvor za goste uz smještajne jedinice na odgovarajući način se primjenjuju odredbe člana 19. ovog Pravilnika.

3. Minimalni uslovi za kamp

3.1. Kapacitet smještajnog dijela objekta

Član 23.

(1) Kapacitet objekta izražava se ukupnim brojem smještajnih jedinica i kapacitetom smještajnih jedinica.

(2) Kapacitet smještajne jedinice (kamp mjesto i kamp parcela) izražava se brojem gostiju/kampera, a iznosi tri gosta/kampera.

3.2. Zajednički sanitarni čvor za goste uz smještajne jedinice, pojedini sanitarni i drugi elementi

Član 24.

Objekt mora imati zajedničke uređene i opremljene prostorije i prostore za ličnu higijenu gostiju i druge namjene za goste u skladu sa ovim Pravilnikom.

V. ZDRAVSTVENI USLOVI ČLANOVA SELJAČKOG DOMAĆINSTVA

Član 25.

U seljačkom domaćinstvu ne mogu se gostima pružati usluge smještaja i prehrane, ako netko od članova domaćinstva boluje ili je obolio od zarazne bolesti određene posebnim propisom ili je duševni bolesnik koji zbog svog stanja ili ponašanja može ometati odnosno ugroziti okolinu.

Član 26.

Zdravstveni pregled članova seljačkog domaćinstva u kojem se pružaju usluge prehrane koji neposredno sudjeluju u pružanju usluga prehrane obuhvaća, pored pregleda kojima se utvrđuju oboljenja iz člana 25. ovog Pravilnika i pregled na salmonele i šigele (kliconoštvo) te na parazite: Enterobius (Oxyuris) vermicularis, hvmenolepisnana, Entamoeba histolytica, Taeniasolium i Lambia intestinalis.

Član 27.

Članovi seljačkog domaćinstva dužni su svake godine tokom rada imati važeću potvrdu od ovlaštene zdravstvene ustanove da nisu evidentirani kao bolesnici iz

člana 25. ovog Pravilnika te da nisu evidentirani na kliconoštvo i na parazite iz člana 26. ovog Pravilnika.

VI. KATEGORIZACIJA OBJEKATA

1. Opće odredbe

Član 28.

(1) Ovisno o uslugama, uređenju, opremi, uređajima, održavanju i ostalim uslovima propisanim ovim Pravilnikom, kategoriziraju se sljedeće propisane vrste objekata:

1. Soba,
2. Apartman,
3. Kamp.

(2) Svaki objekt kategorizira se pojedinačno.

(3) Objekt neprestano za vrijeme rada mora u cijelosti ispunjavati uvjete propisane ovim Pravilnikom za kategoriju koja mu je utvrđena.

(4) Uz uslove iz stava 1. i 3. ovog člana, vrsta Kamp za pojedinu kategoriju mora ispuniti i propisani standard za okoliš.

2. Kategorije objekata

Član 29.

Vrste Soba, Apartman i Kamp kategoriziraju se u tri kategorije:

1. dvije zvjezdice **
2. tri zvjezdice ***
3. četiri zvjezdice ****

3. Uslovi za kategorizaciju

Član 30.

(1) Objekti u seljačkom domaćinstvu kategoriziraju se na osnovu propisanih obaveznih uslova u vezi: usluga, uređenja, opreme, uređaja, održavanja i dr.

(2) Objekti u kojima se usluge pružaju ljeti, unutar razdoblja od 1. maja do 31. oktobra, ne moraju zadovoljiti određene uslove u skladu sa priložima iz stava 3. ovog člana.

(3) Uslovi za kategorizaciju koji u objektu moraju biti ispunjeni utvrđeni su u priložima ovoga Pravilnika i to:

1. Prilog II. – Uslovi za kategorizaciju Sobe u seljačkom domaćinstvu,
2. Prilog III. – Uslovi za kategorizaciju Apartmana u seljačkom domaćinstvu,
3. Prilog IV. – Uslovi za kategorizaciju Kampa u seljačkom domaćinstvu.

4. Način označavanja vrste i kategorije objekta

Član 31.

(1) Vrsta i kategorija objekta označavaju se pločom (oznakom) u skladu sa članom 13. ovog Pravilnika.

(2) Na ploči iz stava 1. ovog člana navodi se naziv vrste objekta i to za:

1. vrstu Soba: SOBE,
2. vrstu Apartman: APARTMAN,
3. vrstu Kamp: KAMP.

(3) Pored naziva iz stava 2. ovog člana na ploči iz stava 1. ovog člana navodi se i odgovarajuća kategorija koja se označava zvjezdicom.

5. Promjena vrste i/ili kategorije objekta

Član 32.

Ako se u kategoriziranom objektu činjenično stanje promijeni tako da objekt naknadno ispuni uslove za drugu vrstu i/ili višu kategoriju, član seljačkog domaćinstva koji ima rješenje, neovisno o bilo kakvom roku može podnijeti zahtjev za izdavanje novog rješenja o odobrenju za drugu vrstu i/ili višu kategoriju.

VII. NAČIN RAZVRSTAVANJA I KATEGORIZACIJE – OPĆENITO

Član 33.

(1) Razvrstavanje i kategorizacija provodi se primjenom:

1. Zakona o upravnom postupku

– uvidom i analizom podnijetog zahtjeva i priloženih dokaza,
– utvrđivanjem činjenica uviđajem/ima u objektu s obzirom na postavljeni zahtjev te primjenom:

2. Zakona o ugostiteljskoj djelatnosti,
3. ovog Pravilnika.

(2) Zahtjev za utvrđivanje ispunjenosti minimalnih uslova i uslova za kategoriju objekata iz člana 4. ovog Pravilnika koji se označavaju s četiri zvjezdice podnosi se Federalnom ministarstvu okoliša i turizma

(u daljem tekstu: Ministarstvo)

(3) Zahtjev za utvrđivanje ispunjenosti minimalnih uslova i uslova za kategoriju objekata iz člana 4. ovog Pravilnika koji se označavaju s dvije ili tri zvjezdice, podnosi se općinskom, odnosno gradskom organu uprave nadležnom za poslove ugostiteljstva prema mjestu sjedišta objekta (u daljem tekstu: nadležni organ).

(4) Zahtjev iz stava 2. i 3. ovog člana, sadrži sljedeće podatke: Ime i prezime, jedinstveni matični broj i adresa prebivališta podnositelja zahtjeva. Uz zahtjev, podnositelj zahtjeva prilaže sljedeće dokaze: da je državljanin BiH, da je poslovno sposoban, da je vlasnik objekta (soba, apartman ili kuća za odmor i sl.) ili zemljišta za kamp, da ispunjava propisane zdravstvene uslove, da objekt u kojem će se pružati usluge ispunjava propisane minimalne uslove i uslove za kategoriju u skladu sa ovim Pravilnikom, da nije pravosnažnom sudskom presudom ili rješenjem o prekršaju izrečena mjera sigurnosti ili zaštitna mjera zabrane pružanja usluga u domaćinstvu, te podatke o broju i površinama smještajnih jedinica.

(5) Postupak kojim se utvrđuje da li su ispunjeni minimalni uslovi i uslovi za kategoriju ugostiteljskih objekata za smještaj iz člana 4. ovog Pravilnika koji se označavaju s četiri zvjezdice, provodi Komisija Ministarstva, koje se sastoji od najmanje 3 člana, koje čine stručnjaci Ministarstva, a imenuje je Ministar.

(6) Postupak kojim se utvrđuje da li su ispunjeni minimalni uslovi i uslovi za kategoriju ugostiteljskih objekata za smještaj iz člana 4. ovog

Pravilnika koji se označavaju s dvije ili tri zvjezdice, provodi Komisija nadležnog organa, koja se sastoji od najmanje 3 člana, a imenuje je rukovodilac nadležnog organa.

Član 34.

(1) Ugostitelj snosi troškove postupka iz člana 33. stav 5. ovoga Pravilnika, koje čine: dnevica, troškovi prijevoza, troškovi smještaja i naknada za rad, koja pripada članovima Komisije.

(2) Članu Komisije dnevno pripada naknada za rad u visini iznosa dnevnice.

(3) Ugostitelj je dužan izmiriti troškove postupka, na način što će ukupne troškove iz stava 1. ovog člana direktno uplatiti članovima Povjerenstva.

VIII. PRIJELAZNE I ZAVRŠNE ODREDBE

Član 35.

Ugostitelj koji pruža ugostiteljske usluge u objektima iz člana 4. ovog Pravilnika, obavezan je, u roku od jedne godine od dana stupanja na snagu ovog Pravilnika uskladiti svoje poslovanje s odredbama ovog Pravilnika, odnosno pribaviti rješenje o kategorizaciji objekta u roku od jedne godine od dana stupanja na snagu ovog Pravilnika.

Član 36.

Danom stupanja na snagu ovoga Pravilnika prestaje važiti Pravilnik o pružanju ugostiteljskih usluga u seljačkom domaćinstvu ("Službene novine Federacije BiH" broj: 23/96).

Član 37.

Zahtjevi ugostitelja za utvrđivanje minimalnih uslova i uslova za kategoriju, te upis u Upisnik ugostiteljskih objekata, koji su u postupku upravnog rješavanja na dan stupanja na snagu ovog Pravilnika, riješit će se u skladu s ovim Pravilnikom.

Član 38.

Ovaj Pravilnik stupa na snagu osmog dana od dana objavljivanja u "Službenim novinama Federacije BiH".

Ministar
dr.sc. Nevenko Herceg

Broj: 06/1-22-4-1118/10
Sarajevo, 24.5.2010.godine

